





清刻龍藏佛說法變相圖

八經同卷

敬九

八關齋經

孝子經

黑氏梵志經

阿鳩留經

敬九

佛為阿支羅迦葉自化作苦經

佛說罪業報應教化地獄經

佛說龍王兄弟經

佛說長者音悅經

八關齋經

宋 沮渠京聲 譯

聞如是一時婆伽婆在舍衛城祇樹給孤獨園爾時世尊告諸比丘我今當說聖八關齋諦聽諦聽善思念之我今當說對曰如是世

尊爾時彼比丘從佛受教世尊告曰於是比丘若信族姓子族姓女欲知聖八關齋便教某甲當作是說猶如阿羅漢盡形壽不殺生亦不教人殺生無怨恨心常懷慙愧有慈心愍一切衆生我字某某爲阿羅漢所教自今已後隨意所欲不復殺生無怨恨心常懷慙愧有慈心愍一切衆生猶如阿羅漢盡形壽不盜好施亦不教人盜常樂閑處如是我字某某爲阿羅漢所教隨意所欲不復盜竊常懷惠施樂閑居處猶如阿羅漢盡形壽不習不淨行常修梵行清淨無穢而自娛樂如是我字某某爲阿羅漢所教自今已後不復婬泆清淨無穢猶如阿羅漢盡形壽不妄語常行審諦最尊最貴諸尊長爲世所貴如是我字某某爲彼阿羅漢所教自今已

後更不復妄語亦不教人使習妄語當行審諦爲世尊長不行妄語猶如阿羅漢亦不飲酒如是我字某某自今已後隨意所欲亦不飲酒亦不教人使飲酒猶如阿羅漢盡形壽不犯齋隨時食如是我字某某今一日一夜隨意所欲亦不犯齋亦不教人使犯齋隨時食猶如阿羅漢盡形壽不於高好座坐如是我字某某今一日一夜不於高廣座坐亦不教人使高廣座坐猶如阿羅漢盡形壽不習歌舞戲樂亦不著文飾香熏塗身今一日一夜不習歌舞戲樂亦不著文飾香熏塗身如是修行聖八關齋於是八關齋中功德不可限量言有爾所福爾所功德爾所福報如是衆多福不可稱計諸比丘譬如五大流水皆同一處所謂恒伽謠婆奴新頭河脂

耶婆提摩棄彼水所流處不可限量言有爾
所水有爾所瓶水有爾所千瓶百千瓶水如
是聖八關齋福不可稱量言有爾所福爾所
功德爾所果報此大福不可稱計爾時諸比
丘聞佛所說歡喜奉行

八關齋經